

四庫全書

史部

欽定四庫全書

史部

河南通志卷六十二

詳校官監察御史臣莫璿篆

檢討臣德生覆勘

總校官編修臣王燕緒

校對官助教臣卜維吉

謄錄監生臣金特

欽定四庫全書

河南通志卷六十一

理學

天地古今理而已矣學不講則理不明講學以明理  
啟前聖之橐籥作後學之津梁莫盛於有宋蓋自二  
程子倡道伊洛一時從遊如李劉尹謝諸賢皆克行  
其緒迨及元明轉相師授中州理學之傳久而益振  
雖立說間有差池或確守程朱或參良知之說要其

衛正斥邪守先待後皆本心得而身體力行非分門  
樹幟斷斷焉務口說以角勝者

盛世敦尚實學崇禮先儒俎豆之典簡編之光也謹次  
講學諸儒別為一帙自北宋始志理學

開封府

明李承恩字君賜祥符人父母早喪祖父母鞠育之  
幼不為童戲八歲就塾師端慎如老成人弱冠入  
邑庠為弟子員督學使者優之俾聚講大梁書院

正德十四年領鄉薦明年試禮闈不第乃罄囊購  
理學諸書以歸閉門潛玩時有心得見之著述辨  
析精當多先儒所未發著易經大義詩經大義書  
經拾蔡學庸拾朱孟子說若干卷又為宋儒太極  
圖說定性書顏子所好何學論西銘諸解以發其  
蘊平生著述甚富又有河濱日錄劄記存稿若干  
卷事詳開封府志及中州道學編

皇清冉覲祖字永光中牟人康熙辛未進士官翰林院

檢討請假歸里孜孜以倡明正學為務時登封耿  
介潛心理學延為嵩陽書院長俾之振聾發矇其  
為學深造閫奧著述繁夥喫緊示人處尤在天理  
主敬一圖卒年八十餘雍正元年祀鄉賢

張伯行字孝先儀封人年七歲入小學恂恂恪恭  
有儒者氣象中康熙乙丑進士初授中書科中書  
舍人丁父艱回籍服闋以薦赴河工劾力屢著勞  
績補山東濟寧道遷江寧按察司

聖祖南巡特授福建巡撫置社倉毀淫祠褒廉吏糾貪墨  
訪猾隸奸昏寘諸法教化大行閩故為理學藪伯  
行建鰲峰書院為學舍百二十楹祀有宋五子選  
士肄業其中數躬詣書院勗諸生以明體達用之  
學士子蒸蒸向風旋移撫江蘇辛卯科場弊發疏  
劾督臣噶禮營私壞法禮亦馳疏許參

聖祖鑒伯行清介仍予留任而黜禮伯行復任後建紫陽  
書院督課諸生越三年入署總督倉場侍郎尋管

理錢法補戶部右侍郎仍兼倉場事

皇上御極眷注特厚

命專理戶部事每會議大政伯行多與焉尋陞禮部尚書乙巳以疾卒於官

上命鎮國公奠茶酒賜祭葬謚清恪伯行天性樸誠好學不倦凡所設施皆本於實踐確遵程朱不惑異說嘗慕陸隴其謂為薛胡以後一人其論學宗旨如此雍正七年

題請崇祀鄉賢

歸德府

宋程迥字可久寧陵人靖康之亂南徙餘姚登隆興  
元年進士歷知進賢上饒數縣以恩義導民欺詐  
以革暇則賓禮賢士進其子弟之秀者為之陳說  
詩書質疑問難無間蚤暮所著有古易考古易章  
句易傳外編春秋傳顯微例目論語傳孟子章句  
等書卒官朝奉郎朱熹以書告迥子絢曰敬維先

德博聞至行追配古人釋經訂史開悟後學當世之務又所通該非獨章句之儒而已曾不一試而奄棄盛時此有志之士所為悼歎咨嗟而不能自已者然著書滿家足以傳世是亦足以不朽已絢巴陵尉能理寃獄孫仲熊亦有名

明魯邦彥字鄭卿睢州人七歲失怙出就外傳稍知經義即以聖人為可學被服造次不離儒者嘉靖己酉鄉試第一庚戌成進士授行人滿一考當選

備侍從會嚴嵩柄國遲久不遷念母老遂疏終養  
杜門却軌潛心經術學以程朱為宗務實踐不標  
榜為名高隆慶改元臺省交薦起吏部主事改光  
祿丞俱不拜疏陳十事皆鑿鑿可施行時執政內  
隙疏偶及之鄉人留不果上見者以為有經世之  
具所著有河圖洛書說大學講中庸解就正錄皆  
平正精實多前人所未發嘗語人曰中庸不可能  
也學之從獨介始通方之人不足與議矣平生細

行必矜非禮弗履卒年四十有七巡按御史疏請  
從祀大梁總祠

徐養相字子存睢州人少工舉子業研究經傳解  
悟疑譌復潛心性理曰為學不宗濂洛非學也嘉  
靖己酉登鄉薦丙辰成進士筮仕餘姚表章王氏  
之學與多士朝夕講習三年興起甚衆陞兵部車  
駕司主事以守正不阿忤時相罷歸遂以明道淑  
人為己任日聚生徒講解經書性理遠近從學者

常數百人駢岡錦水之間比屋皆絃誦聲平生事  
親極孝治喪一遵古禮不用浮屠不讌弔客縉紳  
家多取法焉卒年七十六所著有四書說略禮經  
輯覽近恒文集藏於家事詳湯斌洛學編

呂坤字叔簡寧陵人離襁褓即不妄言笑不與羣  
兒嬉戲年十五五經皆通讀性理諸書欣然有會  
作夜氣鈔拓良心詩立論專主躬行作省心記以  
自檢嘉靖辛酉舉於鄉隆慶辛未捷南宮丁母憂

萬曆甲戌對策成進士初知襄垣襄垣劇尚嚴明  
繼調大同大同貧尚撫字兩地均德之王家屏任  
吏部特疏擢吏部主事故事新曹郎尚緘默卑伏  
不敢輕有可否坤獨錚錚不少畏避出為山東參  
政後巡撫山西著實政錄仕宦資為模楷歷陞刑  
部左侍郎致仕家居講學學者咸宗之稱為沙隨  
夫子年八十三卒有去偽齋集閨範四禮疑四禮  
翼交泰運諸書行於世卒贈刑部尚書諭祭葬賜

廕

王慕祥字承休睢州人原籍獲嘉因以獲嘉為號  
性至孝勵志讀書早以大儒自期年二十四入郡  
庠端莊凝重履繩蹈矩對妻孥如賓客以移風易  
俗為己任嘗設壇集里中子弟講孝經小學風雨  
寒暑不愆期纂釋聖訓五冊憲使通行各屬令老  
儒朔望登講游其門者百餘人嚴立課程先德行  
而後文藝稍軼即嚴訶之人所行非義有潛自改

悔者曰慮為王先生知也金忠節鉉父顯名為郡學博鉉建言削籍省親至郡見慕祥嘆曰伊川之流也令其諸弟皆從學焉所著有艮明山房文集聞見錄諸書皆根極理道頗多發明云

竇如珠字帝珍柘城人諸生早失恃事繼母以孝著待異母弟敦友愛不私財器於辭受大節尤繩尺惟謹人憚其剛方不敢以私干之而樂易平恕未嘗矜世絕物處內外尊卑間怡怡如也平居教

授講學從遊甚衆衣冠必整步趨必嚴初不以顛沛流離稍失禮容嘗與門人張震張益遇隴畔間師弟雍雍觀者起敬其講求服習一遵程朱之訓不為他說所惑有語錄數十卷卒祀鄉賢

皇清湯斌字孔伯號潛菴睢州人自少卓立舉動尺寸年十二聽里中耆儒王慕祥講小學侍坐終日無倦容退即見諸行事慕祥奇之年十六就傅郭外值流寇陷州城斌母趙罵賊死後避亂三衢讀書

山中念母死節益自刻苦嘗中夜大哭哭已復讀  
山中人皆感動亂定始北歸順治戊子舉於鄉明  
年會試中式越三年壬辰成進士改庶吉士鍵戶  
一室惟與魏象樞曹本榮以理道相切磋乙未簡  
翰林科道官出任監司斌得陝西按察司副使備  
兵潼關時關中多盜斌嚴行保甲令民各設鉦鼓  
砲石遠近以次傳警盜發輒得陞嶺北道參政治  
所在贛贛四省上游地穹山深箐大盜李玉廷窟

穴其中斌用計平之賴人以安後以父老乞歸里  
居垂二十年潛心性命之學渡河執弟子禮於孫  
竒逢歸而充養愈邃屹然推中原巨儒戊午

詔舉博學鴻儒大臣交荐

御試甲等補翰林院侍講尋以日講官直

經筵敷陳詳盡深契

聖祖意超擢內閣學士兼禮部侍郎尋巡撫江蘇斌涖任  
後一以教化為先痛除吳中積習禁服食玩好之

不節者尤嚴絕捕博及拳勇鬪毆禁婦女毋遊觀  
取五通神偶投於湖下令期於必行復親詣學宮  
命諸生講孝經俾幼穉皆得列坐以聽吳民翕然  
向風陞禮部尚書掌詹事府益被優禮每會推會  
議必問湯斌云何斌感殊遇凡是非可否必侃侃  
正言不娶不撓尋轉工部尚書以疾卒於官訃

聞

特命學士以潼酪奠馳驛護其喪歸予祭塋吳人聞斌

卒皆號慟失聲斌於學無所不窺而一以忠孝誠  
正為本其所著書不為空言有洛學編一卷補睢  
州志五卷詩文若干卷明史稿若干卷行於世康  
熙四十年祀鄉賢

竇克勤字敏修號靜菴柘城人壬子舉於鄉任南  
陽府泌陽縣教諭倣朱子白鹿洞規分立五社長  
各置勸善規過簿月朔稽善過而勸懲之每月初  
五日集髻年童子習禮儀稍長者解性理人皆興

行戊辰登進士由庶常授檢討珥筆翰苑益肆力於經史尋以病乞歸居室狹隘捐貲修學宮葺朱陽書院士林多所成就幼嘗與睢陽湯斌嵩陽耿介往復商確互闡學旨所著有理學正宗孝經闡義尋樂堂家規泌陽學條規等書康熙四十七年祀鄉賢

彰德府

明崔銑字子鍾安陽人父陞以進士歷參政清直著

聲銑資稟穎敏風骨岐嶷十歲從父授四書毛詩  
明年從諸儒講太極圖周易弱冠舉鄉試入太學  
與四方知名士秦偉馬理呂柟寇天敘馬卿張士  
隆相友約明經修行母慕高虛母溺訓詁立志毅  
然弘治乙丑成進士選翰林院庶吉士授編修正  
德初逆瑾竊柄以不附已調南京京吏部主事瑾誅  
召還史館晉侍讀嘗侍經筵講說命因勸上去讒  
頑戒逸豫時錢寧等在側甚銜之踰年引疾歸構

後渠書屋董耕授徒意泊如也世宗即位用薦起  
修武廟實錄擢南京國子祭酒時集議大禮擯斥  
杖戍者相望銑上疏劾張璉桂萼拾歐陽修之唾  
餘以承望意嚮世廟不悅又勸上勤聖學辨忠邪  
以回天變自分必得罪遂致仕歸田讀書洵上遠  
近從學者衆銑教以研經飭行曰道在五倫學在  
治心功在慎獨家居十六年杜門著書以闡道翼  
經為志己亥東宮立慎選宮僚召補少詹事尋遷

南京禮部右侍郎疾作致仕卒贈禮部尚書諡文敏所著有讀易餘言中庸凡松憲寤言及刪定二程遺書中說考晦菴文鈔鄴郡志文苑春秋等書行世學者稱後渠先生

衛輝府

皇清孫奇逢字啟泰又字鍾元本直隸容城人明萬曆庚子舉人

國初遷居輝縣講學授徒於蘇門遂為輝人奇逢少以

孝聞與鹿忠節善繼定交即以擔荷聖學自任結  
茅講習不樂仕進

本朝定鼎屢徵俱以疾辭天下稱曰孫徵君晚年講學  
夏峯學者又稱為夏峯先生中州談理學言睢州  
湯斌嵩陽耿介諸人皆出其門其學在隨時隨處  
體認天理而功歸慎獨周規折矩不失尺寸著有  
四書近指讀易大旨尚書近指理學宗傳家禮酌  
歲寒居答問孝友堂家規畿輔人物考中州人物

考諸書行世年九十餘卒葬於輝子孫世居輝稱望族焉

懷慶府

元許衡字平仲河內人幼有異質七歲入塾授章句問其師曰讀書欲何為師曰取科第耳曰如斯而已乎師大竒之稍長嗜學如饑渴值世亂且貧無書嘗自日者家得尚書注疏皆散缺請寓宿手抄以歸避難徂徠山始得王輔嗣易說夜思晝誦身

體而力踐之後從姚樞得程朱易傳四書集注或  
問及小學書益大有得初移家蘇門依樞以居便  
講習及樞被徵衡獨處蘇門慨然以明道為己任  
凡喪祭嫁娶必徵於禮以倡其鄉人從學者寔盛  
元世祖王秦中召為京兆提學教化大行及即位  
命為國子祭酒又命議事中書省衡乃疏陳五事  
世祖嘉納之又令定朝議官制後以集賢大學士  
兼國子祭酒其教諄煦懇至而從學者尊師敬業

日改月化雖至童子亦知三綱五常為生人之道  
又嘗領太史院事與郭守敬等定授時歷歷成以  
疾乞還卒於家虞集謂南北未一許衡先得朱子  
之書伏讀而深信之持其說以事世祖儒者之道  
不廢衡實啟之所著有孝經注大學直說及文集  
若干卷傳於世諡曰文正延祐二年從祀孔子廟  
庭

明何塘字粹夫懷慶衛籍武陟人為諸生即有志聖

賢之學弘治辛酉鄉試第一壬戌登進士選翰林院庶吉士授編修正德初逆瑾竊政一日贈諸翰林川扇有人而跪見者塘獨長揖瑾怒不以贈受贈者復拜謝塘正色曰何僕僕也瑾大怒詰其姓名塘直前應曰編修何塘瑾愈怒嬉笑曰翰林貴人也欲害之塘遂累疏乞歸瑾誅名還擢修撰以直經筵觸犯忌諱調開州同知晉東昌府同知乞歸隱居南村四方從學甚衆嘉靖改元起授浙江

提學副使敦本尚實士氣丕變未幾晉南京太常  
卿歷工戶禮三部侍郎南京右都御史致仕家居  
與關中呂柟儀封王廷相靈寶許誥諸人簡札往  
來究辯經書性命之旨行已教人切近精實時以  
比之聖門由賜塘性潔氣剛涵養和粹雖世局變  
推而獨不受染臨事毅然不可奪難進易退有高  
世之節門人請梓文錄曰聖賢之道昭在六籍如  
日星後學愧不能知而行之自宋以來儒者之論

方苦太多此吾之所深懼也卒贈禮部尚書諡文  
定所著有栢齋集十二卷儒學管見陰陽律呂管  
見行於世

婁樞字子靜懷慶衛人少師事何塘嘉靖乙酉領  
鄉薦入成均會朝臣議大禮各樹幟不相下又議  
姚江之學且為洛蜀黨樞著克伐怨欲論四章為  
時所稱授廣宗令時巡撫劉某籍民為兵樞謂擾  
民上鄉兵議劉面從實心銜之適巡按樊某問安

民去貪之畧樞應以所令勿反所好作去甚論刺之二恨交作坐是褫職歸設臯比於東明曹縣者二十餘年著經學史學于學政學五朝文教等書歿後廣宗民肖像祀之

河南府

宋程顥字伯淳洛陽人父珦見人物志顥生而神氣秀爽數歲誦詩書強記過人嘉祐二年舉進士主鄆縣簿折疑獄如神調上元移晉城令專務以德

化民民愛之如父母熙寧初為御史數召見前後  
進說甚多大要以正心窒慾求賢育才為本務以  
誠意感悟主上勸帝防未萌之欲及勿輕天下士  
帝問所以為御史者對曰以臣補闕拾遺裨贊朝  
廷則何敢不勉使臣掇拾羣下短長以沽真名則  
有所不能帝歎賞以為得御史體因議新法不合  
改僉書鎮寧軍判官前後平反重獄以十數求監  
局便養得監河洛竹木務自顯去國神宗終念之

會修三經義語執政曰程顥可用執政不對有自  
洛來者帝問程顥在彼否連言佳士其後以星變  
應詔疏朝政極切帝手批差知扶溝邑多水患顥  
為經畫溝洫未幾罷去嘗曰百里之地至狹也而  
道之興廢係焉然知其當為而不為獨諉之曰命  
則非矣神宗崩遺詔至洛顥感先帝知念終無以  
報也涕滂然下聞司馬呂公著入相曰二公當  
與元豐大臣同更化與時宜之可也若先分黨與

必且為他日之憂蓋遠慮如此又嘗言新法之行亦是吾黨爭之太過成就今日之事塗炭天下亦須兩分其罪可也哲宗立召為宗正丞未行而卒年五十四顥官雖未達天下咸以其進退卜世汗隆卒之日無識與不識皆流涕生平資性過人充養有道和粹之氣益於面背初聞周敦頤論學遂厭科舉業慨然有求道之志泛濫於諸家出入於老釋者數十年返求諸六經而後得之遂以興起

斯文為已任教人以居敬窮理為先辨異端闢邪  
說使聖人之道煥然復明於世蓋自孟子之後一  
人而已太師文彥博題其墓曰明道先生嘉定中  
賜諡曰純淳祐元年封河南伯從祀孔子廟庭

程頤字正叔洛陽人顥弟幼有高識非禮不動與  
兄同受學於周敦頤年十八伏闕上書勸仁宗以  
王道為心生民為念黜世俗之論期非常之功乞  
召對不報已遊太學時海陵胡瑗主教事以顥子

所好何學論試諸生得頤所作大驚即延見處以  
學職呂希哲在隣齋首以師禮事焉既而四方之  
士從遊日衆舉進士不第遂不復就試以明道淑  
人為己任哲宗初呂公著司馬光交薦之謂頤力  
學好古不樂仕進真儒者之高蹈聖世之逸民宜  
擢以不次使士類有所矜式詔以為西京國子教  
授力辭不就元豐八年再詔授崇政殿說書入侍  
經筵盡心啟沃文彥博聽其進講嘆曰真侍講也

後為董敦逸所誣去官紹聖中竄涪州元符末復  
通直郎權判西京國子監言者復論其著書毀朝  
政有旨追毀出身文字所在監司覺察所著書於  
是遷居龍門之南止四方學者曰尊所聞行所知  
可矣不必及吾門也後復宣議郎致仕卒年七十  
五頤與兄顥倡明道學以繼絕緒凡出其門者皆  
有所得世稱伊川先生嘗言無功澤及人而浪度  
歲月宴然為天地間一蠹唯綴緝聖人遺書庶幾

有補著易春秋傳諸書嘉定中賜諡曰正淳祐元  
年封伊陽伯從祀孔子廟庭

邵雍字堯夫其先范陽人祖德新徙衡漳父古徙  
共城後徙洛為洛陽人雍少以才自雄欲樹功當  
世於書無不讀始為學即堅苦廬於蘇門之百泉  
山時北海李之才攝共城令授以易圖雍彌刻厲  
自進冬不爐夏不扇夜不就枕席數年遂抉先天  
之秘探天根躡月窟尤精數學占往知來為有宋

諸儒所不及既復嘆曰昔人尚友千古吾獨未及  
四方其可已乎於是踰河汾涉淮漢周流齊魯宋  
鄭之墟久之幡然來歸曰道在是矣遂定居洛陽  
蓬華環堵不蔽風雨躬爨以養父母時文彥博富  
弼皆以元老碩望至尊重見雍尊禮之與倡和居  
游程顥每見之退輒太息以為內聖外王之學遠  
近學者從問經義精深浩博應對不窮間與深知  
論天下事雖究心世務者不及也嘗自名其居曰

安樂窩春秋佳日乘小車遊城中士大夫爭迎致之或留信宿乃去好事者別作屋如其居以候其至名曰行窩時司馬光兄事雍而二人純德尤鄉里所嚮慕每相戒曰毋為不善恐司馬端明邵先生知舉遺逸補潁川團練推官不就卒贈秘書省著作郎賜諡曰康節所著有皇極經世書六十卷晚尤喜為詩平易而造於理有擊壤集二十卷自為之序咸淳元年從祀孔子廟庭

呂希哲字原明宰相公著子先世本洛人後遷壽州至公著復居洛希哲自幼奉父母訓能循蹈規矩始師事胡瑗孫復石介後復從二程張載遊由是知見益廣務躬行實踐略去枝葉一意涵養以恩補官元祐中充崇政殿說書日夕勸導人主以修身為本修身以正心誠意為本紹聖中坐黨謫居徽宗時歷知曹相邢三州奉祠晚居宿州真揚間十餘年衣食不給處之晏如日讀易一爻遍考

古今諸儒之說默坐沈思隨事解釋夜則與子孫  
評論古今商榷得失嘗言後生初學且須理會氣  
象氣象好時百事自當氣象者辭令容止輕重疾  
徐足以見之矣不惟君子小人於此焉分亦貴賤  
壽夭之所由定也又言攻其惡無攻人之惡蓋自  
攻其惡日夜且自點檢絲毫不盡則不憚於心矣  
豈有工夫點檢他人耶政和中卒子好問見人物  
志孫本中字居仁少從楊時游酢尹焞遊紹興初

特賜進士累官中書舍人兼侍講權直學士卒諡  
文清所著有春秋解童蒙訓師友淵源錄各若干  
卷行世本中孫祖謙祖儉南渡後寓居婺州世有  
中原文獻之傳

李顥字端伯洛陽人才識穎悟舉進士元祐中為  
秘書省校書閣肆開發能自振於流俗程頤謂其  
才器可大受與劉絢相繼卒頤哭之哀悲傳學之  
難焉朱熹亦謂劉質夫李端伯呂與叔諸公所造

尤深所得尤粹云

劉絢字質夫緱氏人髫髻即就程顥程頤受學顥語人曰他人敏則敏矣然未易保也斯人之志吾無疑焉以祖蔭為壽安主簿遷潞之長子令誠心愛養富鄭公弼歎以為古縣令也元祐初以薦授京兆府教授侍御史王巖叟正言朱光庭言春秋學廢已久絢治春秋深通試太學博士絢明粹溫恭孝弟樂善不為異端所惑故其履也安內日加

重無交戰之病故其行也果將終啟手足盥饋安然而逝絢在程門但有所知惟恐不與人共程學之興絢及李籲有力焉

朱光庭字公掞偃師人十歲能文舉進士調萬年主簿數攝邑篆人以明鏡稱之元祐間為諫官論奏無虛日宣仁甚咨納焉黨論作補外數月復召劉摯罷政光庭封麻還落職知亳州尋改潞州病卒光庭始從學於胡瑗已從孫復受春秋已又從

二程於洛服行所聞造次不怠其歿也程頤祭之  
文以為篤學力行至於沒齒不渝涖民臨事一由  
至誠可質神明貫金石雖尚論古人難其比也其  
信許如此

尹焞字彥明一字德充洛陽人祖源見文苑志焞  
少師事程頤嘗應舉發策有議誅元祐黨人語焞  
曰噫是可以干祿乎哉不對而出告於頤曰某不  
復應進士舉矣頤曰汝有母在未容廢祿仕也焞

歸白其母陳母曰吾知汝以善養不知汝以祿養  
頤聞之太息曰賢哉母也於是終身不復應舉頤  
歿焯授徒洛中非弔喪問疾不出戶洛人士以事  
頤者事之靖康初用种師道薦召至京度時不可  
為力謝病歸賜號和靖處士踰年洛陽陷沒家盡  
覆焯死復甦劉豫陷京師聞其名以禮聘具供帳  
山中必致之焯夜為赴水自沈者得亡去轉徙閬  
止於涪涪程頤讀易地也關三畏齋以居紹興初

授崇政殿說書敕有司敦遣乃就道作文祭告頤  
墓而後行曰能行所學則未也不辱師門則有之  
入經筵會陳公輔詆程學屢乞休致朝廷以禮留  
之歷仕左通直權禮部侍郎是時秦檜力主和議  
焯在病中疏諫又以書切責檜檜大怒焯力辭歸  
因差提舉江州太平觀次年乞老寓會稽卒年七  
十有二焯莊敬不欺闇室直方之行動合矩矱晚  
益和粹程頤嘗曰我死而不失其正者尹氏子也

所著有論語解及門人問答若干卷傳於世

國朝雍正二年從祀文廟

張繹字思叔壽安人家甚微年長未知學為人傭  
作聞邑官出入傳呼道路心慕之間何以得此或  
告之曰此讀書所致爾始發憤力學遂以文名會  
程頤自涪還河南繹往受業窮理造微頤甚愛其  
穎悟以族子妻之又嘗言吾晚得二士謂繹與尹  
焯也頤沒一年繹亦沒嘗記頤言行一編名曰師

說行於世

暢大隱字潛道洛陽人師程頤今程氏遺書第二十五卷即其所記

孟厚字敦夫洛陽人從程頤學獨處一室糞穢不治其精專如此後頤之葬門人畏黨禍莫敢至獨厚與尹焞張繹范棫邵溥送焉

元白居敬字行簡登封人甫六歲喪母事父孝聞鄉里及冠羣經諸子無不精究州邑知其名咸備禮

幣請居講席多所開益以其居近崧穎間因自號  
崧谿遠方受業者戶屢滿百如是者三十餘年所  
著有春秋正義尚書新註詩集傳附說易經本義  
附說四書集註附說周子通書附說周子太極圖  
附說張子東西銘解義附說小學書詳說道學發  
明理學詩說諸書

明曹端字正夫澠池人天資穎異造詣篤實教人務  
躬行實踐日事著述坐下足著兩磚處皆穿永樂

戊子舉於鄉為霍州學正十餘年弟子出其門者皆循循雅飭遵其教不恣違州人亦皆薰陶而化方岳重臣不敢以屬禮待至其地必敬謁之凡考校諸生必請端主其去取後以制去起復改蒲州再踰年蒲人樂其化會端考績京師於是蒲霍諸士請闕爭留之以霍疏先上仍命之霍又六年終於官謚靖修所著有孝經述解四書詳說太極圖通書西銘釋文家規輯略存疑錄夜行燭儒宗統

譜月川詩圖性理文集等編傳於世蒲霍之間皆  
祠祀不絕論者以為故明理學之倡世稱月川先  
生

閻禹錫字子與洛陽人童時穎敏讀書日記萬言  
性純孝九歲時哭其父幾至滅性年十九登正統  
甲子鄉薦授昌黎訓導以母喪徒步歸廬於墓側  
三年終制有司以聞詔旌其閭既而聞河汾薛瑄  
講明濂洛關閩之學遂謝舉業去洛從之遊得其

大指而歸轉開州訓導即以所得為教四方從之者日衆州之民無少長皆化之時李賢王翱姚夔相繼引薦於朝後超拜御史提督畿內學政慨然有造就人才之志勵名節敦士風抑詞章之習明本原之學取周子太極圖通書為士子講明之一時人士皆粗知性理又疏場屋數十弊陳之皆見施行世方仰其有為成化甲申無疾正衣冠而逝公卿大臣多惜之士子如失怙恃所著有自信集

若干卷又編類二程全書晦庵要語敬軒讀書錄  
河汾詩集並行於世

白良輔字堯佐洛陽人自幼喜讀性理諸書初請  
業於河東薛瑄瑄未許良輔乃以十挺為贄跼於  
門日昃不返瑄以其誠延置弟子列居歲餘盡得  
其所學登景泰辛未進士拜監察御史按治山西  
陝西俱有聲歷官太僕寺卿天順中卒於家所著  
有太極解律呂新書釋義中庸膚見若干卷

尤時熙字季美洛陽人嘉靖壬午登鄉薦見姚江  
王守仁傳習錄讀之豁然有契於是厭棄詞章一  
意聖賢之學除暑元氏學事教士端趨向重躬行  
闡姚江宗旨而不徒以文藝為課丁艱服闋除章  
丘諭章丘亦如諭元氏也陞國子學正華亭徐階  
為祭酒特重之令六館師生俱以為準陞戶部主  
事權稅許墅關不名一錢民有許墅灘頭無濁水  
蘇州門外有青天之謠尋以母老乞養里居三十

年以講學為務其為說本於致良知而要歸於提  
省人心使知所嚮往不容自己又令學者只於見  
在職分用功曰道無淺深職分固道之實地也其  
立教平實易簡使學者循之可以入道而不至以  
虛見為實際蓋真有功姚江者遠近學者宗之號  
曰西川先生所著有擬學小記聖諭衍行於世

陳麟字道徵洛陽人素厭博士家言謂與理道無  
當故其為文屢不售後念親老乃稍屈就之嘉靖

壬子癸丑遂聯捷成進士嘗語人曰吾雖以此取  
科第然詞章記誦殊非心得之快也初任河間府  
推官以廉明著聲擢禮科給事中甫七日以言事  
廷杖削籍歸聞尤時熙倡道里中偕謝黃門江執  
弟子禮家居專以闡明聖學為事所著有歸田漫  
錄卒祀鄉賢敕建專祠

孟化鯉字叔龍新安人年十六七時以古道自任  
不屑沾沾為舉子業師事同郡尤時熙專心聖學

卓然獨立萬厯庚辰成進士授南京戶部主事丁  
父憂三年廬居同志聚講者日衆立為會約自冠  
婚喪祭以及家庭日用服食好尚之類大要以厚  
風俗崇禮讓返樸還淳為主服闋補戶部主事差  
權河西務剷剔宿弊率士民講聖諭明正學旌節  
義賑貧窮潞河士民依若父師去之日為立生祠  
歲時致祭尋調吏部歷銓曹秉公持正請託不行  
以忤政府削籍歸築書院接引後學成就者甚夥

著有尊聞錄讀易寢言春秋正旨諸儒要言等書  
學者稱為雲浦先生歿祀鄉賢

張信民字孚若又字抱初澠池人童時嚮慕曹端  
言動奉以為程十五遊於庠聞新安孟化鯉倡道  
函關往從之毅然以斯道為己任由明經授懷隴  
令善啟迪多士以不避權貴謫檢校與關中馮從  
吾商訂學問日夜不懈歸田後秦晉之間以及汝  
潁睢陽之士雲擁川至室不能容臺使者李日宣

請主韶陽會過其廬恨相見晚日與王以悟等講  
太極周易於止學書院天啟之季學遭厲禁就小  
東山下建靜室養晦其中所著有日抄理學彙粹  
劄疑講學會解月川年譜訓蒙要纂四禮述洗心  
錄一喙錄行世祀鄉賢

皇清耿介字介石登封人順治壬辰進士由檢討出為  
福建巡海道築石城以捍盜寇除積弊革冗費丁  
母憂歸從孫奇逢游既以詹事湯斌薦授詹事府

少詹乞休旋里慨然以倡明絕學為己任興復嵩陽書院所著有理學要旨中州道學編孝經易知敬恕堂存稿行於世

汝寧府

宋謝良佐字顯道上蔡人初以記問為學自負該博往扶溝從程顥受學語次舉前史不遺一字顥曰賢却記得許多可謂玩物喪志良佐慙汗浹背面發赤顥曰只此便是惻隱之心嘗告以靜坐於是

良佐遂時時靜坐性誠篤每理會事未深徹其穎  
有泚穎嘗稱其展拓得開將來可望後卒業穎弟  
頤所與頤別一年復來見問其所進曰但去得一  
矜字頤歎其善學因謂朱光庭曰是子可謂切問  
近思者矣良佐舉進士宰應城胡安國以典學使  
者行部過之不敢問以職事顧因介紹請以弟子  
禮見入門見吏卒植立庭中如土木偶人肅然起  
敬遂稟學焉建中間名對除書局忤旨出監京西

竹木場坐飛語繫詔獄褫官卒諡文肅所著有論語說文集語錄行世

皇清張沐字冲酉上蔡人自幼厲志聖賢之學舉順治戊戌進士授內黃令沐為治專務教化令民各書為善最樂四字於門以自警註六諭敷言使家傳戶誦修蘧伯玉祠以使者配朔望聚諸生講學明倫堂有疑即令質難蒞任五年以降調去百姓攀號如失父母尋以薦授四川資縣令未幾以老病

乞休歸里與孫竒逢湯斌往來講學巡撫某聘主  
遊梁書院晚年闢白龜圃草宇土壁以受四方學  
者卒祀鄉賢

許州

宋靳裁之許昌人少聞伊洛程氏之學由是學問益  
強智識日明嘗曰士之品大槩有三志於道德者  
功名不足以累其心志於功名者富貴不足以累  
其心志於富貴而已者則亦無所不至矣胡安國

入太學時以師事之

陝州

明許誥字廷綸靈寶人吏部尚書進子十歲善屬文  
弘治乙卯與弟讚同舉於鄉己未成進士授戶科  
給事奉命清理延綏倉場有苗中官者督三邊貪  
縱罔法誥具狀劾之直聲遂著正德初因父進起  
為大司馬大臣子弟例不居言路改翰林檢討劉  
瑾欲納交進痛絕之瑾怒矯詔黜進籍罰邊儲三

百石誥謫廣西全州判官會奔父喪服除即絕意  
仕宦授徒講學若將終身瑾敗起尚寶丞復以病  
請告里居十餘年講學如故嘉靖改元起南京通  
政司叅議輔臣薦宜充經幄改侍講學士為經筵  
講官上緝熙聖學四事帝皆聽納擢太常卿掌國  
子監祭酒事獎風節抑華競以經世為士筌尊德  
為學軌人士翕然化之尋擢吏部右侍郎晉南戶  
部尚書卒諡莊敏贈太子太保誥天性孝友敦重

人倫其學本諸實行達之世務嘗曰聖賢所傳心  
法六籍所遺訓典要在用世綏人耳苟無益於時  
文將奚為所著有通鑑前編圖書管見道統源流  
詩考易參易餘春秋意見中庸本義太極圖論性  
學篇等書學者稱為函谷先生

王以悟字惺所陝州人童時聞益化鯉之賢即裹  
糧求為弟子誠苦備至既而引謁尤時熙時熙喜  
謂得人萬歷甲辰成進士授邢臺令刻復古諭俗

諭士諸約值歲大饑條上利病二十事設法煮粥  
民沾實惠舉卓異擢兵曹有感時事疏請罷內市  
嚴禁衛杜異端皆闕切大政不報置鼎新會與士  
大夫論學出為山西參政蕭然行李單車就道甫  
三月即告歸與張信民呂維祺諸人倡明師說於  
正學書院嗣會於分陝龍興寺又會於甘棠學者  
如歸其論學以躬行為主嘗曰須迴顧此擔子如  
何究竟如何結果歲月不多恐碌碌過去分校順天

鄉試鹿忠節善繼出其門

河南通志卷六十一

欽定四庫全書

河南通志卷六十二

儒林

漢司馬遷傳儒林七人皆經學之士其後各史視以  
為例然則非有功聖學固無以列於儒林矣自宋史  
別道學儒林而二之不免後人異議然以濂洛關閩  
諸賢視邢昺孫奭輩其位置固不能無殊焉矧道學  
之名昉於宋宋以前經學之士謂之儒林可謂之道

學不可也謹編諸儒始自兩漢及程邵以後其以說  
經著聞者并附焉志儒林

開封府

漢假倉字子驕陳留人事平陵張山拊受小夏侯尚  
書以謁者論石渠官至膠東相

許晏陳留人宣帝時山陽張游卿為諫大夫以詩  
授元帝晏師游卿為博士由是張家有許氏學

彭宣字子佩陽夏人治易事張禹舉博士遷東平

太傅禹薦其明經有威重可任政事入為右扶風  
累官大司空封長平侯王莽專政宣上印綬乞骸  
骨歸里

鄭興字少贛開封人少學公羊春秋晚善左氏傳  
嘗從劉歆講正大義歆使撰條例章句訓詁及校  
三統歷更始立自丞相長史累遷涼州刺史坐事  
免會赤眉入關東道不通興乃西歸隗囂囂虛心  
禮請而興恥為之屈會囂遣子恂入侍興因恂求

歸葬父母遂與妻子俱東時建武六年也以杜林  
薦徵拜大中大夫數言政事依經守義文章溫雅  
以不善讖故不能任後監征南軍留屯成都左轉  
蓮勺令以事免遂不復仕

鄭衆字仲師開封人年十二從父興受左氏春秋  
精力於學明三統歷作春秋難記條例兼通易詩  
知名於世建武中皇太子及山陽王荆因虎賁中  
郎將梁松以縑帛聘請欲為通義引籍出入殿中

衆以儲君無外交之義藩王不宜私通賓客固辭  
不受及梁氏事敗賓客多坐之惟衆不染於辭永  
平初辟司空府以明經給事中累官至大司農在  
位以清正稱其後受詔作春秋刪十九篇卒於官  
子安世亦知名於時

劉昆字桓公陳留東昏人以施氏易教授弟子恒  
五百餘人光武聞之授江陵令時縣連年火災昆  
向火叩頭每反風滅火後守弘農驛道多虎行旅

不通昆為政三年虎皆負子渡河召拜光祿勳上  
問行何德政而致是事對曰偶然耳左右皆笑其  
質訥帝嘆曰此長者之言也命書諸策以騎都尉  
致仕詔賜第洛陽以千石祿終其身子軼字君文  
傳其業門徒亦盛累遷宗正世掌其官

尹宙字周南鄆陵人治公羊春秋熹平初仕五官  
掾功曹守昆陽令居鄉恂恂能親九族比入仕則  
正色立朝人皆仰之

張興字君上鄆陵人習梁丘易以教授舉孝廉累遷侍中祭酒拜太子少傅明帝數訪問經術聲稱著聞弟子自遠至者著錄且萬人為梁丘家宗卒於官子魴世其業位至張掖屬國都尉

樓望字次子雍丘人治嚴氏春秋操節清白有稱鄉閭永平初為侍中入講省內遷大司農坐事左轉為左中郎將教授不倦世稱儒宗諸生著錄者九千餘人年八十卒於官門生會葬者數千人儒

家以為榮

楊倫字仲理陳留東昏人少師事司徒丁鴻習古文尚書為郡文學掾後辭去講授于大澤中弟子至千餘人郡禮請三府並辟公車徵皆辭疾不就後特徵博士為清河王傅順帝即位拜侍中以上書直辭不遜免官陽嘉二年拜大中大夫後為將軍梁商長史諫諍不合出補常山王傅司隸促發乃留朝歌以疾固辭因坐稽留王命免歸閉門教

授自絕人事卒於家

阮諶字士信陳留人精求禮制與鄭康成同時有名受禮於潁川綦冊君取其說為圖三卷後世傳三禮圖諶所作也

陳弇字叔明陳留人受歐陽尚書於丁鴻為蘄長罷歸以尚書教授

爰延字季平陳留外黃人清苦好學能通經教授桓帝時舉賢良方正遷侍中帝嘗問朕何如主對

曰中主帝曰何以言之曰尚書令陳蕃任事則治  
中常侍黃門預政則亂是以知之帝嘉其言拜五  
官中郎將累遷大鴻臚以病乞骸骨還家靈帝時  
復特徵不起子驥白馬令亦稱善士

三國蕪林字孝友陳留人博學多識古今奇字黃初  
中為博士給事中官至散騎常侍以老歸第年八  
十餘卒有孝經注一卷

晉庾峻字山甫鄆陵人好學有才思仕魏為博士時

方尚老莊峻獨潛心儒典魏主幸太學問尚書義  
峻援引師說發明經旨遷秘書丞入晉歷遷御史  
中丞侍中常侍與何劭論風雅正變之義劭不能  
至嘗疾世浮華不修名實著論非之子珉欽俱見  
忠烈志

宋維字為則雍丘人乾德中以九經及第太宗時  
權太子左贊善大夫嘗使高麗王治問禮維對以  
君臣父子之道升降等威之序治悅謂曰今日復

見中國之夫子也累遷國子祭酒兼工部侍郎受  
詔校定五經疏義

崔頤正字

門

封丘人與弟偓佺並舉進士頤正

為高密尉以孔維薦為國學直講奉命刊正諸經  
音疏真宗立常召頤正於苑中說尚書大禹謨賜  
以牙緋改博士卒偓佺自連江尉判國子監帝幸  
國學召說尚書所撰有帝王手鑑十卷

明朱睦㮮字灌甫周藩鎮平恭靖王四世孫至性孝

友自幼端穎李夢陽一見即竒之徧謁名儒受經  
學悉通大義訂正秦漢以來諸家經解凡所發明  
多得之世儒箋註之外于書無不窺尤精于易春  
秋卽第建萬卷堂訪購圖籍讐校精細萬厯間舉  
文行卓異為周藩宗正十餘年復領宗學孜孜講  
說雖寒暑不輟卒年七十著有五經考疑授經圖  
陂上集遜國褒忠錄中州人物志等書

歸德府

漢丁寬字子襄梁人初梁項生從田何受易時寬為  
項生從者讀易精敏材過項生遂事何學成東歸  
何謂門人曰易已東矣寬至洛陽復從周王孫受  
古義號周氏傳景帝時寬為梁孝王將軍拒吳楚  
號丁將軍作易說三萬言寬授同郡碭田王孫王  
孫授施讐孟喜梁丘賀繇是易有施孟梁丘之學  
焦延壽字贛梁人嘗從孟喜問易作易林十六卷  
京房受學焉由是易有京氏之學成帝時補小黃

令能察隱伏奸邪斂跡化行舉最當遷民上書乞  
留詔許增秩留之

戴德字延君梁人與從子聖字次君受禮於后倉  
德號大戴仕信都太傅聖號小戴以博士論石渠  
至九江太守由是禮有大小戴氏之學大戴授瑯  
琊徐良小戴授同郡橋仁楊榮由是大戴有徐氏  
小戴有橋楊氏之學

夏恭字敬公蒙人習韓詩孟氏易講授門徒嘗千

餘人王莽末盜賊攻沒郡縣恭以恩信為衆所附  
擁兵固守蒙賴安全光武即位嘉其忠果召拜郎  
中再遷太山都尉和集百姓甚得其歡心卒於官  
諸儒謚曰宣明子牙見文苑志

桓榮字春卿龍亢人少習歐陽尚書嘗教授九江  
徒衆數百人王莽敗亂榮抱其經書與弟子逃匿  
山谷雖常飢困而講論不輟後復客授江淮間建  
武中辟大司徒府遷議郎入授皇太子經每朝會

輟令於公卿前敷奏經書帝稱善命為博士晉太  
子少傅拜太常明帝即位尊以師禮甚見親重永  
平二年三雍初成拜榮為五更封關內侯及卒帝  
親變服臨喪送葬賜冢塋於首山之陽

桓郁字仲恩龍亢人榮子少以父任為郎敦厚篤  
學傳父業以尚書教授門徒常數百人榮卒郁當  
襲爵讓於兄子汎明帝不許不得已受封悉以租  
入與汎帝以郁先師子有禮讓甚見親厚稍遷侍

中帝自制五家要說章句令郁校定入授皇太子  
經數進忠言多見納錄永元初累遷侍中奉車都  
尉代丁鴻為太常卿初榮受朱普學章句四十萬  
言及榮入授明帝減為二十三萬言郁復刪省定  
成十二萬言由是有桓君大小太常章句云

桓焉字叔元龍亢人郁子少以父任為郎明經薦  
行有名稱永初元年入授安帝經三遷為侍中步  
兵校尉永寧中為太子少傅月餘遷太傅後以廷

議守正順帝即位封陽平侯累官至太尉以日食免卒於家弟子傳業者數百人黃瓊揚賜最為顯貴焉兄子麟早有才慧桓帝初為議郎侍講禁中會母終不勝哀而卒所著碑誄讚說書凡二十一篇麟子彬少與蔡邕齊名舉孝廉仕為尚書郎所著七說及書凡三篇

宋曹城應天府人大中祥符間於戚同文舊居旁造舍百餘區聚書數千卷延生徒講習甚盛有司以

聞詔賜額應天書院命同文孫舜賓主之署誠府  
助教

明楊澗字湛如商丘人萬曆壬午舉人師楊起元以  
正心為則與里中孝廉王國貞俱以道統自勵所  
著有人倫寶鑑四書微言等書初仕興化令置祭  
田數百畝以祀范仲淹興學課士大學士吳桂大  
司寇解學龍皆出其門後守霸州時內侍居霸者  
多擾害地方澗攜印抵都竟謁司禮監痛陳其狀

司禮遂戒其下不得犯楊知州法致仕後霸鄉老  
來訊問者常數十人涕泣不忍去

彰德府

隋馬光字榮伯武安人少好學從師數十年晝夜不  
息圖書識緯莫不涉覽尤明三禮為儒者所宗開  
皇初高祖徵山東義學之士光至授太學博士嘗  
因釋奠高祖親幸國子學王公以下車集光升坐  
講禮啟發章明已而諸生以次論難者十餘人皆

當時碩學光剖析疑滯上嘉而勞焉初教授羸博間門徒千數至是多負笈從長安後數年丁母憂歸鄉里遂有終焉之志以疾卒時年七十三

唐馬嘉運內黃人少為沙門後改治儒講授白鹿山中受業者千餘人貞觀中召拜宏文館學士以孔穎達五經正義繁蕪掎摭其疵當時諸儒服其精博後歷崇賢館學士

元薛大猷字嘉甫湯陰人至正間第進士棄而不仕

隱居教授學者多宗之著四書講意

衛輝府

漢賈護字季平黎陽人初尹更始以左氏春秋授胡  
常常以授護哀帝時待詔為郎授蒼梧陳欽子佚  
與劉歆並有聞於時由是言左氏者必本賈護劉  
歆

隋崔良佐滑州人擢明經補湖城簿以母喪去官遂  
不復仕治詩書易春秋有文名子鵬舉進士博學

宏詞賢良方正皆異等仕至武部郎中

唐王恭白馬人少篤學教授鄉閭弟子數百人貞觀  
初召拜太學博士講三禮別為義證甚精博蓋文  
懿文達為當時大儒每講徧舉先儒義理必暢恭  
所說

懷慶府

漢趙子河內人事燕韓生受詩學趙子授同郡蔡詛  
誼授同郡食子公與王吉食生為博士授泰山栗

豐吉為昌邑中尉授淄川長孫順由是韓詩有王  
食長孫之學豐授山陽張就順授東海髮福皆至  
大官徒衆尤盛

張元字君夏河陽人少習嚴氏春秋兼通數家法  
建武初舉明經補弘農文學遷陳倉縣丞清靜無  
欲專心經書諸儒皆服其多通著錄千餘人時右  
扶風瑯邪徐業大儒也聞元諸生試引見之與語  
大驚遂請上堂難問極日後元去官舉孝廉除為

邳會顏氏博士缺元試第一拜為博士居數月諸  
生上言元兼說嚴氏宣氏不宜專為顏氏博士光  
武且令還署未及遷而卒

趙商河內人鄭康成高足弟子康成經傳洽熟稱  
為醇儒弟子數千人而商為之冠

南北朝司馬裴字元表溫人父燮善三禮任齊為國  
子博士裴少傳家業強力專精手不釋卷沛國劉  
瓛為儒者宗嘉其學深相賞好與樂安任昉善昉

亦推重之梁天監初除尚書祠部郎時創定禮樂  
裝所建議多見施行每吉凶禮當世名儒明山賓  
賀瑒等疑不能斷者皆取決焉累遷御史中丞出  
為晉安王長史卒王命庾肩吾集其文為十卷所  
撰嘉禮儀注一百一十二卷

司馬筠字貞素溫人少孤貧好學及長博通經術  
尤明三禮梁天監初為暨陽令有清績入拜尚書  
祠部郎後為尚書左丞卒子壽傳父業明三禮仕

為曲阿令

常爽字任明溫人魏高陽鄉侯林六世孫少而聰敏篤志好學五經百家多所研綜州郡禮命皆不就北魏世祖西征涼土爽歸款軍門賜爵六品拜宣威將軍是時戎車屢駕征伐四出貴游子弟未遑學術爽置館溫水之右教授門徒七百餘人京師學業翕然復興爽立訓有勸罰之科弟子事之若嚴君焉尚書左僕射元贊平原太守司馬真安

著作郎程靈虬皆與所成就崔浩高允並稱之曰  
文翁柔勝先生剛克立教雖殊成人一也其為通  
識歎服如此教授之暇述六經畧注甚有條貫獨  
守閒靜講肄經典二十餘年時號為儒林先生

元呂戴字伯充河內人從許衡學衡為國子祭酒舉  
戴為伴讀輔成教養其功為多至元中授四川行  
樞密院都事巴人感德立祠以祀累官翰林侍讀  
學士致仕卒封東平郡公謚文穆

河南府

漢周王孫洛陽人與王同丁寬服生同受易於田何  
著易傳數篇

乘宏河南人與殷嘉姚平同受易於京房皆為郎  
博士

蔡欽字君長河南人嘗授毛詩於塗暉世傳水經  
為欽所作

杜子春河南緱氏人治周禮當永平初年已九十

猶能誦識時賈遠鄭衆皆往受業因為發明其說  
著周禮解其後諸家作周禮訓詁皆祖子春云

孫堪字子穉緱氏人明經學有志操建武中仕郡  
縣公正廉潔俸祿不及妻子皆以供賓客永平中  
拜光祿勳數有直言後為侍中都騎尉堪行類周  
澤而澤字穉都京師號曰二穉

隋元善洛陽人祖義魏侍中父羅梁青冀三州刺史  
善少隨父至江南學通五經侯景之亂歸後周授

太子宫尹開皇初遷國子祭酒帝嘗視學命講孝經善敷陳義理帝大悅賚賜甚厚

唐元澹字行冲河南人博學尤通訓詁舉進士累官通事舍人狄仁傑罷之後為宏文館學士元宗自註孝經詔澹為疏立學宮卒謚曰獻

宋聶崇義洛陽人少舉三禮善禮學通經旨仕漢累官國子禮記博士校定公羊春秋刊板於國學仕周為司業兼太常博士世宗以郊廟祭器止由有

司相承製造無所規式命崇義檢討纂畫以聞又  
正禘祫之禮參定郊廟祭玉入宋仍任太常博士  
又上考正三禮圖太祖覽而嘉之賜紫袍犀帶銀  
器繒帛以獎之命將三禮圖畫於國子監講堂之  
壁崇義為學官兼掌禮僅二十年凡郊廟禮制多  
所更定世推其該博

崔頌字敦美偃師人父協唐平章事頌以廕補官  
歷漢周官至左諫議大夫宋初判國子監始會生

徒講說太祖每臨幸國學與語經義及詢典禮頌  
古對閑雅應答無滯上甚重之子曉太子右贊善  
大夫曠字文炳舉進士有士行仕至太常少卿

邵伯溫字子文洛陽人父雍見理學志伯溫入聞  
父教出與司馬光呂公著程氏兄弟交故所聞日  
博尤熟當世之務以薦初授大名府教授調長子  
蔚章惇為相薦之朝伯溫願補外得授永興鑄錢  
監徽宗初上書數千言欲復祖宗制度辯宣仁誣

謗解元祐黨錮語極懇至除知泉州請罷歲輸瀘  
南諸州綾絹絲綿數十萬以寬民力擢提點成都  
路刑獄會賊史斌窺劍門伯溫與蜀帥盧法厚合  
謀防守賊竟不能入蜀人德之紹興中卒趙鼎少  
從伯溫遊及相始贈秘閣修撰嘗表其墓曰以學  
行起元祐以名節居紹聖以建言廢崇寧世以此  
三言盡伯溫出處云所著有河南集聞見錄及皇  
極系述辯誣辯惑皇極經世序觀物內外篇解近

百卷

元薛友諒號直齋永寧人以明經擢用仕至翰林院直學士歷官幾五十年所至興學崇教嘗請升周程諸儒從祀文廟建書院祀先聖先賢人咸重之卒入鄉賢祠

明李士元字子仁洛陽人弱冠舉於鄉即有志聖賢之學會尤時熙講學於洛即首為依歸篤信不移初授如臯教諭嘗進諸生語之曰性命之理只在

人倫日用間故其為教獎行檢折經旨一時士風  
翕然丕變晉國子監助教端軌彰志一如在如臯  
時歷遷代州知州多善政罷歸以疾卒時熙為之  
泣然曰斯道孤矣萬厯末年從祀鄉賢

南陽府

漢樊儵字長魚湖陽人光武舅壽張侯宏子謹約有  
父風事後母至孝及母卒哀毀過禮帝嘗遣中黃  
門朝暮送餼粥服闋就丁恭受公羊嚴氏春秋永

平元年拜長水校尉與公卿雜定郊祠禮義以識  
記正五經異說北海周澤瑯邪承宮並海內大儒  
儵皆以為師友而致之於朝二年以壽張國益東  
平王徙封儵燕侯儵初刪定公羊嚴氏春秋章句  
世號樊侯學教授生徒前後三千餘人弟子潁川  
李修九江夏勤皆為三公

洼丹字子玉涑陽人世傳孟氏易王莽時常避世  
教授專志不仕徒衆數百人建武初徵為博士累

遷至大鴻臚卒嘗作易通論七篇世號注君通丹  
學義研深易家宗之稱為大儒

宗衷字仲子南陽章陵人為荊州五等從事註易  
說九卷

尹敏字幼季堵陽人少為諸生初習歐陽歙尚書  
後受古文兼善毛詩穀梁左氏春秋建武初上疏  
陳洪範消災之術詔拜郎中辟大司空府帝以敏  
博通經記令校圖讖敏對讖書非聖人所作其中

多近鄙別字恐疑誤後生帝不納三遷長陵令永  
平中仕至諫議大夫

宋京安衆人以大夏侯尚書教授仕至遼東太守  
魏滿字叔牙南陽人習京氏易教授永平中至弘  
農太守

丁鴻字孝公定陵人父緄先武時以功封陵陽侯  
鴻年十三從桓榮受歐陽尚書三年而明章句善  
論難為都講初緄從世祖征伐鴻獨與弟盛居憐

盛幼小共寒苦及緦卒鴻當襲封上書讓國於盛  
不報遂逃去後友人鮑駿責以大義鴻感悟垂涕  
乃還就國開門教授駿亦上書言鴻經學至行永平  
十年詔徵鴻至召見說文侯之命篇拜侍中尋兼  
射聲校尉徙封魯陽鄉侯詔與諸儒論定五經同  
異於北宮白虎觀鴻才高論難最明時人嘆曰殿  
中無雙丁孝公元和三年徙封馬亭鄉侯累官司  
徒時竇憲兄弟各擅威權鴻因日食上封事譏切

竇氏書奏十餘日帝以鴻行太尉兼衛尉屯南北  
宮收竇憲大將軍印綬憲及諸弟皆自殺後鴻卒  
賜贈有加常禮

謝該字文儀南陽章陵人明春秋左氏為世名儒  
門徒數百千人建安中河東人樂詳條左氏凝滯數  
十事以問該皆為通解之名為謝氏釋行於世仕  
為公車司馬令以父母老託疾去官欲歸鄉里會  
荊州道斷不得去少府孔融薦於朝徵拜議郎以

壽終

三國許慈字仁篤南陽人善鄭氏學治易尚書三禮  
毛詩論語與許靖等俱自交州入蜀時又有胡潛  
雖學不贍洽然卓犖彊識昭烈帝定蜀鳩合典籍  
沙汰衆學慈潛並為博士

來敏字敬達新野人涉獵書籍善左氏春秋尤精  
於爾雅訓詁昭烈帝定益州署敏典學校尉後為  
虎賁中郎將丞相諸葛亮駐漢中請為軍祭酒輔

軍將軍累遷光祿大夫子忠博覽經學有父風大將軍姜維善之辟為參軍

晉范甯字武子順陽人父汪博學有幹畧仕至都督徐兗二州刺史甯少孤貧執喪盡禮廬於外家園中燃薪寫書徧誦讀初官徐兗以忤桓溫廢溫死起為餘杭令興學校養生徒期年風化大行後為豫章太守遣議曹下屬城取郡大姓子弟充學徒課五經甯以傳春秋者多互異漢何休守公羊最嚴

晉杜預特尊左氏而穀梁無能發明因沉思積年  
商畧名例著為集解傳於世從祀 文廟

梁范縝字子直舞陰人少孤貧事母孝謹及長博通  
經術尤精三禮仕南齊位尚書殿中郎入梁為晉  
安太守在郡清約惟資公祿而已歷遷尚書左丞  
有集十五卷子胥傳父業位國子博士

元富珠哩翀字子翬順陽人狀貌魁梧不妄言笑其  
為學一本於性命道德文章典雅深合古法累官

集賢直學士兼國子祭酒時諸生素已望紳至是  
私相歡賀紳以古者教育有業退必有居遂作屋  
四區以居學者諸生積分有六年未及釋褐者紳  
至皆使就試而官之會帝師至京師有旨大臣皆  
郊迎俯伏進觴帝師不為動紳舉觴立進曰帝師  
釋迦之徒天下僧人師也余孔子之徒天下儒人  
師也請各不為禮帝師為起立至元四年卒封南  
陽郡公謚文靖有集六十卷子遠見忠烈志

汝寧府

漢尹更始字翁君汝南人宣帝時從蔡千秋受穀梁春秋通其義與蕭望之等各以明經顯名於世又著左氏章句子咸大司農

桓寬字次公汝南人治公羊春秋宣帝時舉為郎至廬江太守丞博學善屬文推行鹽鐵之議著數萬言凡六十篇

周防字偉公汝陽人師事徐州刺史蓋豫受古文

尚書建武時舉孝廉拜郎中撰尚書雜記三十二篇太尉張禹薦補博士遷陳留太守坐法免

鍾興字次文汝陽人從丁恭受嚴氏春秋光武召拜左中郎將詔定春秋章句以授皇太子又使宗室諸侯從興受章句封關內侯興自以無功不敢受爵帝曰生教訓太子及諸王侯非功耶興讓其師丁恭於是復封恭而興遂固辭

戴憑字次仲平輿人習京氏易舉明經仕至侍中

兼虎賁中郎將建武中正旦朝賀帝令羣臣能說  
經者更相難詰義有不通輒奪其席以益通者憑  
遂重坐五十餘席京師語曰解經不窮戴侍中在  
職十八年卒於官詔賜東園梓器錢二十萬

袁良字周卿汝陽人習孟氏易平帝時舉明經為  
太子舍人又舉孝廉建武初為成武令傳其學於  
孫安安見人物志

周磐字堅伯汝南安成人好禮有行非典謨不言

少游京師學尚書洪範左氏傳諸儒宗之居貧養  
母儉薄不充乃就孝廉之舉和帝初拜謁者除任  
城長遷陽夏重合令皆有惠政後思母棄官還鄉  
里母歿哀毀服終遂廬塚側立精舍教授門徒常  
千人公府三辟以有道特徵俱不應

廖扶字文起平與人習韓詩歐陽尚書教授嘗數  
百人父為北地太守永初中坐羌沒郡下獄死扶  
感父以法喪身憚為吏遂絕志世外專精經典州

郡公府辟召皆不就嘗居先人塚側未嘗入城市  
因號為北郭先生

袁京字仲譽汝陽人司徒安子習孟氏易作難記  
三十萬言初拜郎中出為蜀郡太守

南北朝周宏正字思行安成人年十歲通周易老子  
十五召補國子生起家梁太學博士抗直守正累  
遷國子博士城西立士林館居以講授聽者傾朝  
野入陳進尚書右僕射勅侍東宮講論語孝經太

子以宏正德望素重降情屈禮有師資之敬焉卒  
贈侍中謚曰簡所著有周易論語莊子老子孝經  
講疏及文集若干卷並傳于世

汝州

漢延篤字叔堅南陽犇人少從潁川唐溪典受左氏  
傳旬日能諷之典深敬焉桓帝時舉孝廉為平陽  
侯相到官表龔遂之墓立銘祭祀擢用其後徵拜  
議郎著作東觀稍遷侍中復遷左馮翊又徙京

兆尹寬仁恤民郡中歡愛三輔咨嗟與陳留遙鳳  
齊名因忤梁冀以病免教授家巷卒鄉里圖其形  
於屈原廟篤論解經傳多所駁正後儒服虔等以  
為折中所著詩論銘書應試表教令凡二十篇

明李希顏字愚菴郟縣人明經飭行教授鄉里兼於講  
說洪武初為諸王子擇師徵至京命詣大本堂授  
經累官左春坊贊善大夫永樂初引年歸所著有  
大學中庸心法二卷

陳州

漢薛漢字公子淮陽陳人世習韓詩漢少傅父業尤善說災異教授常數百人建武初為博士受詔校定圖讖當時言詩者推漢為長永平中遷千乘太守有異績

蔡衍字孟喜項人明經講授以禮讓化鄉里鄉里有爭訟者輒詣衍決之其所平處皆曰無怨後舉孝廉稍遷冀州刺史徵拜議郎梁冀聞其賢請與

相見行辭疾不往後坐救成瑁免官

蔡元字叔陵南頓人學通五經門徒常千人其著錄者萬六千人徵辟皆不就順帝特詔徵拜議郎講論五經異同甚合帝意遷侍中出為弘農太守卒於官

潁容字子嚴長平人博學多通善春秋左氏師事太尉楊賜郡舉孝廉州辟公車徵皆不就初平中避亂荊州聚徒千餘人劉表以為武陵太守不肯起

著春秋左氏釋例五萬餘言

三國陳秉字德樞南頓人初事鄭康成後避亂交州  
與劉熙考論大義遂博通五經吳主孫權聞其名  
以禮徵太子太傅著周易摘尚書駁論語弼凡三  
萬言行世

許州

漢蒲昌字君都潁川人治齊詩為詹事馬援嘗從之  
受詩

許慎字叔重召陵人性惇篤少博學經籍馬融常  
推敬之時人語曰五經無雙許叔重仕為郡功曹  
舉孝廉再遷除汶長卒於家初慎以五經傳說臧  
否不同乃撰五經異義又作說文解字十四篇皆  
傳於世

唐溪典字季度潁川人精左氏春秋傳為西鄂長  
鍾皓字季明潁川長社人以篤行稱隱密山以詩  
律教授門徒千餘人桓帝時九辟公府徵為廷尉

正博士林慮長皆不就

蔣爽字慈明潁川人幼而好學年十二能通春秋  
 論語太尉杜喬見而稱之曰可為人師桓帝時舉至  
 孝拜郎中對策陳便宜數千言奏入即棄官去後  
 進黨錮隱海上以著述為事遂稱碩儒獻帝初徵  
 拜平原相累遷司空著禮易詩傳尚書正經春秋  
 條例漢語公羊問及辯識凡百餘篇

潁川人開元中左拾遺議禮詳明為儒林

所重詳見唐書儒學傳

明李繼業字肖雲襄城人其曾叔祖戶部尚書敏嘗  
建學舍於邑西南山中置學田購書集遠近多士  
講學所謂紫雲書院者也繼業承先志益加修葺  
讀書其中以程朱許薛四子之書訓迪後進嘉靖  
乙卯登賢書筮仕束鹿以不悅於監司投劾歸移  
家西南山中興復紫雲書院來學之士負笈如雲識  
者以為有洛學之風焉所著有省身錄四卷行世

鄭州

漢服虔字子慎滎陽人少以清苦建志入太學受業  
有雅才善著文論作春秋左氏傳解又以左傳駁  
何休所駁漢事六十條舉孝廉中平末拜九江太  
守免遭亂客行病卒所著賦碑誄書記連珠九憤  
凡十餘篇

陝州

漢董遇字季直弘農人性質訥而好學善左氏傳作

朱墨別異嘗謂學者當惜三餘冬者歲之餘夜者日之餘陰雨者晴之餘魏黃初中為郡守入為侍中大司農子綏亦有才學位至秘書監

晉董景道字文博弘農人少而好學千里從師晝夜讀誦明春秋三傳京氏易馬氏尚書韓詩皆精究大義三禮專尊鄭氏著三禮通論永平中隱於商洛山中彈琴歌嘯以自娛劉淵及聰曜皆徵之固辭不起以壽終

光州

明李達字有孚固始人洪武中鄉舉除劍州學正以  
身為教士皆化之九年考績陞右春坊授諸王經  
仁廟稱其篤實達博通五經尤長於書有子七教  
之甚嚴各授一經邑自元末兵燹之後老師宿儒  
少有存者知向學取科第實自達始

官思恕字守仁光山人嘉靖乙卯舉於鄉喜任俠  
走馬燕山志氣豪邁歸而母彭沒哀毀幾絕結廬

墓傍於百家之言無不涉獵讀易有悟遂絕意仕  
進南游數年還居天中山房默坐研思至忘寢食  
嘗遺友人書曰始吾從羣書入茫乎莫得今從靜  
中討出端倪方信此心原與天地萬物無兩道其  
在茲乎士人翕然宗之所居白沙關山連兩省民  
俗頑梗乃結社其間講明正學發揮太祖聖諭六  
言聽者如堵化柴山巨盜四十八人咸自歸款兩  
臺疏薦思恕孝友詔下徵用會病卒從祀鄉賢

河南通志卷六十二